

# Ontmoeting 3

## Amos

Kinders leer dat Amos slegte nuus vir die Israeliete moes gee.

**Teks:** Amos

**Hulpmiddels:**

- Amos (Kry betyds 'n man wat die rol van Amos kan vertolk. Sorg dat hy presies weet wat om te doen.)
- 4 Banniere: “Hofsaal”, “Huis”, “Winkel”, “'n Fees”
- Afdrukke van die gediggie
- Afdrukke van die gesegde: “Verkeerd is verkeerd...”



### Welkom

**“Slim kinders kom soek werk”:** Verdeel die kinders in twee groepe. Die groepe gaan staan weerskante van die saal of grasperk agter h llyn (wat jy vooraf merk). Die groepe besluit afsonderlik watter werk hulle gaan uitbeeld. Die werk word met aksies en geluide gewys, maar sonder woorde. Sodra hulle op 'n werk en aksies besluit het, tree die groepe agter die lyne aan. Die eerste groep huppel na die tweede groep toe en roep: “Slim kinders kom soek werk.” Hulle herhaal dit totdat hulle voor die ander groep staan. Die groep reageer met: “Watter werk?” Hulle antwoord: “Enige werk.” Groep 2 reageer: “Nou doen dit.” Groep 1 demonstreer hulle werk en groep 2 raai wat hulle doen. Sodra groep 2 reg raai, moet groep 1 hardloop om agter hulle llyn te kom en groep 2 moet probeer om hulle te vang. Die kinders wat gevang word, gaan oor na groep 2. Ruil nou om. Die speletjie kan gespeel word totdat daar niemand in een groep oorbly nie (of solank daar tyd is – die groep met die meeste kinders wen).

**Assosiasies:** Jy noem h woord en hulle moet reageer met woorde wat daarby pas. Bv. “braai” en hulle reageer met “vuur, vleis, slaai, pap, wors, ens.” Doen dieselfde met “plaas”, “mall”, “partytjie”, “kerk/Kix”.



### Wyding

**Stilword-ritueel:** Laat die kinders die volgende verse agter die leier aan sê: “Die Here is my herder, ek kom niks kort nie. Hy laat my rus in groen weivelde. Hy bring my by waters waar daar vrede is. Hy gee my nuwe krag. Hy lei my op die regte paaie tot die eer van sy Naam.” (Ps 23:1-3)



### Woord

*Stel Amos aan die kinders bekend en laat hy sy verhaal vertel:*

“Hallo julle!! Ek hoor julle leer van Prettige Profete. Ai, ek wens my storie was prettig, maar toe nie... Sien, ek het geboer met skape en bokke en wildevee. Dit was nou lekker, so rustig op my eie. Dit was nie 'n moeilike taak om wildevee te kweek nie – hulle is mos wild. My kleinvee was ook maklik om te hanteer. Ek wou so oud word: niemand pla my nie en ek pla hulle nie. Maar toe vat die Here my van my maklike lewe af weg. Ek wil nou hê julle moet sien wat die Here vir my gewys het. Eers het Hy vir my vertel hoe sleg die mense in ander lande was. Dit was nie vir my snaaks nie. Ek het dit eintlik verwag. Maar toe stuur hy my stad toe, na my eie mense toe. Dís wat ek nou vir julle wil wys.” (Stap na die eerste banier as jy plek het om met die kinders rond te loop van plek tot plek. Anders kan jy dit uitbeeld op een plek.)

**Eerste uitbeelding:** Banier: “Hofsaal”

Drie kinders beeld dit uit – 'n arm man, 'n sandaalverkoper en 'n slawe handelaar. Die sandaalverkoper baklei met die arm man omdat hy nog nie die sandale klaar betaal het nie. Hy gryp hom en verkoop hom aan die slawehandelaar.

Amos 2:6b: “... hulle verkoop onskuldige mense vir geld, arm mense oor 'n paar sandale.”

**Amos reageer:** Daar het ek gesien hoe sleg behandel my mense mekaar. Kom ons kyk verder.

**Tweede uitbeelding:** Banier: “Huis”

4 Kinders beeld dit uit – Pa, ma en kinders wat mekaar skel en rond stamp..

Amos 3:10: “Hulle wat geweld en verwoesting in hulle mooi huise herberg, weet nie hoe om reg te doen nie, sê die Here.”

**Amos reageer:** Ek het gedink my mense is ordentlik, maar kyk net hoe sleg gaan dit in hulle huise.

**Derde uitbeelding:** Banier: “Winkel”

Twee kinders beeld dit uit. Een kind kom koop 'n halwe brood met R 5,50. Die winkellier wil R 11 vir die halwe brood hê en weier om die kind te help.

Amos 8:5: “Julle sê: “Wanneer is Nuwemaan verby dat ons koring kan verkoop, of Sabbat, dat ons ons graanwinkels weer kan oopmaak en minder graan vir meer geld kan verkoop? Ons laat die skaal mos kul soos ons wil!”

**Amos reageer:** Hoe kan hy dit doen?! Waarvan moet die kinders lewe as hy so onregverdig is en net wil ryk word?

**Vierde uitbeelding:** Banier: “'n Fees”

Vyf kinders maak asof hulle, hulle dronk drink en afgode aanbid.

Amos 5:21 en 23: “Ek haat julle feeste, Ek wil nie die feeste hê nie. Ek hou nie van julle gewyde feesdae nie. Hou op sing! Ek wil nie luister wanneer julle musiek maak met 'n harp nie.”

**Amos reageer:** Ek kan verstaan dat die Here die feeste haat.

*(Amos gaan sit met die kinders en vertel verder.)* “Ek het begin praat en die mense gewaarsku dat God hulle gaan straf. Hulle het my stilgemaak en gesê: ‘Jy is nie 'n profeet nie. Ons het profete en hulle sê die Here gaan ons seën. Bly jy stil.’ Ek weet ek is nie 'n profeet nie, ek kom van die plaas af. Ek ken vee en wildevye, maar God het my daar weggevat en na julle toe gestuur. Ek moet julle waarsku. So kan dit nie aangaan nie.

Die Here het toe vir my duidelik gesê: ‘Ek hou hulle dop. Ek gaan hulle van die aarde af wegvee.’

My hart was so seer toe ek dit hoor, maar ek het verstaan. Ons is almal sondaars. God kan nie alles net los dat dit so aangaan nie. Toe gee God vir my 'n belofte.

Hy het gesê: ‘Ek gaan julle weer herstel. Ek gaan uiteindelik die land weer nuut maak. Ek sal genoeg mense laat oorbly wat My sal respekteer en die land weer sal opbou. Daar sal weer vrede wees, genoeg om te eet, mooi tuine en nuwe huise. Hou moed.”

Die kinders kry tyd om oor die verhaal te dink:

1. Ek wonder watter deel in die storie jy die meeste van hou.
2. Ek wonder watter deel van die storie sou jy wou uitlaat.
3. Ek wonder watter van die dinge wat Amos gesien het, gebeur vandag nog.



**Werskaf**

- Gedig en prent: Laat die kinders die gediggie lees/leer en die prent inkleur.
- Versier die gesegde “Verkeerd is verkeerd...”

### Sluit af met die seënbede





Die Here is VOOR jou om jou pad gelyk te maak;  
Die Here is AGTER jou om jou teen slegte dinge te beskerm;  
Die Here is LANGS jou om jou in sy arms toe te vou;  
Die Here is ONDER jou om jou te dra as jy mag val;  
Die Here is BOKANT jou om jou te seën;  
En die Here is BINNE jou om jou te lei met sy Heilige Gees.



### AMOS

Amos kom van 'n plaas daar ver.

Jy hoor net skape blêr.  
God lei hom na die dorp;  
hy gaan vat die volk kort.  
Hy preek en pleit en bid;  
hy wil almal wakker skud:  
“Begin reg lewe,  
Ura God om te vergewe;  
Draai om, draai terug;  
Dan hoef julle nie te vlug.”



**HOFSAAL**

**HUIS**

**WINKEL**

**'N FEES**

**VERKEERD**

is **VERKEERD,**

selfs al doen

**ALMAL** dit.

**REG** is **REG,**

selfs al doen

**NIEMAND** dit nie.